



تلخيص المحاضرة السابعة عشر

سورة الحديد ج 1

«« سورة الحديد: سورة مدنية.

«« قاعدة جليلة أن مَنْ لا يعرف ربه كيف يعبد؟ لما تتعرفوا على الله بأسمائه وصفاته اعرف ربنا كويس كل ما أعرف ربنا أكثر كل ما أجد نفسي أحسن في العبادة أبعد عن المنكر.

- قال تعالى {سَبِّحْ لِلَّهِ مَا فِي السَّمَاوَاتِ وَالْأَرْضِ ۖ وَهُوَ الْعَزِيزُ الْحَكِيمُ}

«« التسبيح هو تنزيه الله عن كل عيب ونقص.....

كل ما في السماوات والأرض يسبح الله.... دخلة السورة نفسها بثنيتك انتوا متخيلين؟ الدخلة نفسها بثنيتك يعني إيه ثنيتك؟ ثنيتك على الإيمان أنا لو عندي مشكلة دلوقتي في التزامي إيه هي؟ أنا حاسس نفسي غريب.... هتيجي السورة تقولك لا أنت مش لوحداك تعالى أوريك إنت معاك كل ما في السماوات والأرض إنت ماشي مع الطبيعة.

«« يقولك مَنْ تُقال للعاقل وما تُقال لغير العاقل.

طب ليه ربنا قال ما ومقالش مَنْ؟

- قال لأن أغلب اللي بيسبح ربنا هما غير العاقل فعلاً اللي إحنا بنسميه غير العاقل يعني الدواب والشجر والكلام دوت ولإن غالب خلق الله أصلاً غير عاقل، العاقل نقصد بيه الإنس والجن.

- {الْعَزِيزُ} «» معناه الذي لا يُغالب.

- {الْحَكِيمُ} «» ربنا الحكيم خلص الكلام أنا بقى فهمت مفهمتش ، عرفت الحكمة معرفتش الحكمة ، الكلام ده ميلزمنيش أنا ربي الحكيم.

- {الْعَزِيزُ الْحَكِيمُ}

«» بتقولك ربك بيحميك وربك مبيقولكش حاجة غلط أبدًا اطمئن وإنّ مع الكثرة شوفوا بس الدخلة نفسها عاملة إزاي إنت مع الغالبية ربك العزيز متغلّش وربك الحكيم مبيضلّكش أبدًا.

- قال تعالى {لَهُ مُلْكُ السَّمَاوَاتِ وَالْأَرْضِ}

«» كان أحد السلف قيل له ألا تخشى الفقر؟ قال: "كيف أخشى الفقر وربى الذى أعبده له ما فى السماوات وما فى الأرض وما بينهما وما تحت الثرى".

- قال تعالى {يُحْيِي وَيُمِيتُ}

«» كل حاجة هتتغير أحوالك تتبدل يُحيي قلبك ويُميت قلبك حسب حالك، يُحيي بدنك ويُميت بدنك، وبرضو فيها إثبات البعث.

- قال تعالى {وَهُوَ عَلَى كُلِّ شَيْءٍ قَدِيرٌ}

«» ده ربي؟ آه، اللي أنا بعبده؟ آه، حبيبي؟ آه، اللي هيحبني لو قربتله هيعملي كل حاجة؟ آه.... خد قراراتك ومتخافش.

- قال تعالى {هُوَ الْأَوَّلُ وَالْآخِرُ وَالظَّاهِرُ وَالْبَاطِنُ} وَهُوَ بِكُلِّ شَيْءٍ عَلِيمٌ

ما معنى {هُوَ الْأَوَّلُ}؟

الذي لم يكن قبله شيء، ده بيصب معايا في حاجتين:-

1- لما بيحصل حاجة حلوة بحمد ربنا عليها ومبيصبنيش العُجب لأن أنا بفتكر بقول طب ما بتُعجب بإيه طب ما أصلاً قبل ما أنت تتخلق كان كاتبها لك فأنت اشكر ربنا وتواضع وانكسر.

2- ولما يحصل مصيبة بتهدى برضو بتقول خلاص {هُوَ الْأَوَّلُ} يعني برضو كانت في علمه قبل ما تحصل الحمد لله إن هي حصلت (ما أصابك لم يكن ليخطئك).

ما هو الآخر؟

الآخر يعني ليس بعده شيء يعني مفيش حاجة بعد ربنا سبحانه وتعالى هو الآخر هو الباقي.

- معنى تانى: الآخر الذي تنتهي إليه إرادات العباد وغايات العباد، فلما الإنسان بيحصل ربنا هو مراده وهو الآخر بيهدأ لأن ده المراد اللي مفيش بعده مراد فهنا يسكن النفس وتطمئن.

- هو الوحيد الباقي بذاته، تاني هو الوحيد الباقي بذاته لأن ممكن واحد يجادل يقولك طب ما إحنا في الجنة خلود بلا موت فأحنا باقين والحدود العيون باقين والملايكة الخدم هيبقوا باقين هنعوله لأ الآخر هو الباقي بذاته أما ما عدا الله فإن بقي فإنه يبقى ببقاء الله له فخلود أهل الجنة بإذن الله وخلود أهل النار بإذن الله.

ما معنى الظاهر؟

ليس فوقه شيء الله تعالى له العلو وعلو الله تعالى..... وعلو الله يشمل علو الذات وعلو القدر وعلو القهر.

1- ذاته {الرَّحْمَنُ عَلَى الْعَرْشِ اسْتَوَى} [طه : 5] مفيش حد فوقه سبحانه وتعالى لإن العرش كما يقولون هو سقف المخلوقات والرحمن على العرش استوى فهو فوق كل مخلوقاته مُباين عنهم منفصل عنهم.

2- وعلو القدر قدره عالي مفيش أكيد حد أعلى من قدر الله ده المعنى الثاني.

3- وعلو القهر يعني هو سلطانه على العباد.

معانى الظاهر

«الذي يُعين عباده ويُعين أوليائه».

«الذي يقدر أن يُظهر دينه ولو كره الكافرون».

ما معنى الباطن؟

يعني لا يوجد أحد أقرب إلى عباده منك، قرب علم وإحاطة وهنا أصلاً الكمال.

«الأربع أسماء دول ليهم علاقة ببعض على فكرة إزاي؟»

قالوا الأول والآخر شملت الزمان والظاهر والباطن شملت المكان فالأربع أسماء دول شملوا كل الزمان وكل المكان وبالتالي الله تعالى أحاط بكل شيء علمًا زمنيًا ومكانيًا.

- قال تعالى {هُوَ الَّذِي خَلَقَ السَّمَاوَاتِ وَالْأَرْضَ فِي سِتَّةِ أَيَّامٍ ثُمَّ اسْتَوَى عَلَى الْعَرْشِ}

«يبين ملكه وخلقه سبحانه وتعالى في ستة أيام ثم استوى على العرش، استوى على العرش ده كده بيان الذات.

- قال تعالى {يَعْلَمُ مَا يَلْجُ فِي الْأَرْضِ وَمَا يَخْرُجُ مِنْهَا}

«اللي بيلج في الأرض المطر بينزل فيها الحبوب بتتنزل فيها، فيه كائنات بتتنزل تحت فكل ده يلج في الأرض..... يخرج منها الأشجار يخرج منها النباتات المعادن كل حاجة بقي.

- قال تعالى {وَمَا يَنْزِلُ مِنَ السَّمَاءِ}

«إيه اللي بينزل من السماء؟ المطر الملائكة الوحي الأمر كل حاجة.

- قال تعالى {وَمَا يَغْرُجُ فِيهَا}

«زي الملائكة والكلم الطيب.

- قال تعالى {وَهُوَ مَعَكُمْ أَيْنَ مَا كُنْتُمْ} ربط الموضوع بالعلم قال {وَاللَّهُ بِمَا تَعْمَلُونَ بَصِيرٌ} عشان يقولك المعية دي مش معية ذات، المعية دي معية علم وإحاطة «» ده الكمال

- {إِنَّ اللَّهَ مَعَ الَّذِينَ اتَّقَوْا وَالَّذِينَ هُمْ مُحْسِنُونَ}

«» معية خاصة اللي هي معية التوفيق والتسديد والإعانة والهداية والرشاد.

- قال تعالى {يُولِجُ اللَّيْلَ فِي النَّهَارِ وَيُؤَلِّجُ النَّهَارَ فِي اللَّيْلِ وَهُوَ عَلِيمٌ بِذَاتِ الصُّدُورِ}

«» يُولِجُ يعني يُدْخِلُ هذا في هذا ويُدْخِلُ هذا في هذا، يعني إيه يُدْخِلُ ده في ده ويُدْخِلُ ده في ده؟ زي ما إحنا بنشوف كده هل الليل والنهار ثابتين دايماً؟ ولا بنحس إن الليل بيخش في النهار والنهار بيخش في الليل هي دي يُولِجُ يعني يبقى الليل طويل والنهار قصير «» بتدل على ملك رهيب جداً

- قال تعالى {وَهُوَ عَلِيمٌ بِذَاتِ الصُّدُورِ}

«» أنا أعلم اللي جوه صدرك وأنا مستوي على عرشي... مخيف يا جماعة شيء مخيف هو شيء مخيف ومطمئن في نفس الوقت، زي ما ربنا يعلم معصيتك بيعلم طاعتك، زي ما ربنا يعلم الحسد اللي جواك بيعلم الخير اللي جواك.

- قال تعالى {آمِنُوا بِاللَّهِ وَرَسُولِهِ وَأَنْفِقُوا مِمَّا جَعَلَكُمْ مُسْتَخْلَفِينَ فِيهِ ۖ فَالَّذِينَ آمَنُوا مِنْكُمْ وَأَنْفَقُوا لَهُمْ أَجْرٌ كَبِيرٌ}

«الكلام للصحابة وهما في المدينة! طيب يعني إيه؟..... إن الأمر بالشيء وهو حاصل هو أمر بأحد الاحتمالات التالية.

- 1- إذا لم يكن موجوداً فهو أمر بإيجاده.
- 2- وإذا كان موجوداً ولكن يحتاج إلى كمال فهو أمر بإكماله.
- 3- وإذا كان موجوداً كاملاً فهو أمرٌ بالثبات عليه.

- {وَأَنْفِقُوا مِمَّا جَعَلَكُمْ مُسْتَخْلِفِينَ فِيهِ}

«المعنى الأول ربنا بيأمرهم بالإنفاق، بيقول أنفقوا مما جعلكم مستخلفين فيه بيوصف المال إن المال هو مش بتاعك هو ربنا أستخلفك عليه، فالمال في النهاية هو مال الله تعالى»

«المعنى الثانى إن كلمة مستخلف دي من الخلافة بتديك معنى زائد إن المال ده رايح للي بعدك المال ده فيه واحد هياخده بعدك فيه خلافة هixلفك في الأرض الوريث بتاعك هياخد المال ده بتاعك كده كده في حد هيورثه، فتكسب إنت بيه رضا ربنا دلوقتي ولا كده كده هو رايح لغيرك.

- قال تعالى {وَمَا لَكُمْ لَا تُؤْمِنُونَ بِاللَّهِ وَالرَّسُولِ يَدْعُوكُمْ لِتُؤْمِنُوا بِرَبِّكُمْ}

«يدعوكم بالبينات وبالأدلة وبالبراهين.

- قال تعالى {وَقَدْ أَخَذَ مِيثَاقَكُمْ إِنْ كُنْتُمْ مُؤْمِنِينَ}

- 1- إذا كان الكلام هنا المقصود بيه الصحابة، هيتفسر بإيه الميثاق؟ هيتفسر ببيعة العقبة.

2- الكلام هنا للناس كلها يبقى بعض المفسرين فسرها على الميثاق الأول
اللي ربنا أخده علينا مذكور في سورة الأعراف {وَإِذْ أَخَذَ رَبُّكَ مِنْ بَنِي
آدَمَ مِنْ ظُهُورِهِمْ} الله سبحانه وتعالى أخرج من ظهر آدم كل ذريته
الأرواح يعني قبل ما نتواجد أصلاً {وَأَشْهَدُهُمْ عَلَى أَنْفُسِهِمْ أَلَسْتُ
بِرَبِّكُمْ} [الأعراف : 172] كلنا قولنا بلى.

- قال تعالى {هُوَ الَّذِي يُنَزِّلُ عَلَى عَبْدِهِ آيَاتٍ بَيِّنَاتٍ}

«» النبي عليه الصلاة والسلام كان معاه آيات بينات كثير الإخبار بالغيب
آيات بينات، القرآن نفسه آيات بينات، الأدلة العقلية اللي جوه القرآن البلاغة
آيات بينات، المعجزات آيات بينات كل دي آيات بينات، يعني الكلام مش
مجرد عاطفي لأ الكلام بأدلة.

- قال تعالى {لِيُخْرِجَكُم مِّنَ الظُّلُمَاتِ إِلَى النُّورِ}

«» دايماً الظلمات جمع والنور واحد لإن الحق واحد والدين واحد والسنة
واحدة.

- قال تعالى {وَإِنَّ اللَّهَ بِكُمْ لَرَءُوفٌ رَّحِيمٌ}

«» من رحمته أن أنزل الكتاب من رأفته أن أنزل القرآن من رحمته أن
بعث محمد عليه الصلاة والسلام من رأفته أنه بيّن ووضح البينات.

- قال تعالى {لَا يَسْتَوِي مِنْكُمْ مَنْ أَنْفَقَ مِنْ قَبْلِ الْفَتْحِ وَقَاتَلَ ۚ أُولَٰئِكَ
أَعْظَمُ دَرَجَةً مِّنَ الَّذِينَ أَنْفَقُوا مِنْ بَعْدُ وَقَاتَلُوا ۚ وَكُلًّا وَعَدَ اللَّهُ الْحُسْنَىٰ}

«« دلوقتي أمر بالإنفاق عمومًا خلاص بعد كده بيبين حاجة مهمة بيقول لو كلكم أنفقتوا تمام بس فيه فرق اللي أنفق قبل الفتح أجره أعلى من اللي أنفق بعد الفتح قاعدة ليه؟! لأن اللي أنفق في الشدة غير اللي أنفق في الرخاء، اللي أنفق في الضغط والصعوبة غير اللي أنفق لما الدنيا أتيسرت

- هنا الفتح فيها خلاف على قولين:-

1- إن الفتح فتح مكة واستدلوا على كده إن ربنا قال في سورة النصر {إِذَا جَاءَ نَصْرُ اللَّهِ وَالْفَتْحُ}.

2- الفتح الحقيقي هو صلح الحديبية ليه صلح الحديبية كان فتح؟! أولاً ربنا أنزل بعده سورة الفتح أصلاً سورة الفتح نزلت بعد الحديبية ودي كانت قبل فتح مكة، سورة الفتح نزلت بعد الحديبية على طول.

- اللي أنفق بعد الفتح مش كويس ولا اللي أنفق بعد الفتح مثلاً مهدد بالنار لا لا لا فأحصل إستدراك في الكلام قال: {وَكُلًّا وَعَدَ اللَّهُ الْحُسْنَى} الله، قال {وَكُلًّا} وكلّاها {وَعَدَ اللَّهُ الْحُسْنَى} يا سلام هنا كانه إستدراك، مش معنى كلامي ده إن الثاني ده وحش أو هيخش النار لأ ده الإثنين في الجنة.

- قال تعالى {مَنْ ذَا الَّذِي يُقْرِضُ اللَّهَ قَرْضًا حَسَنًا}

«« النفس لما بتسمع كلمة قرض دي بتحس إن هو راجع لما تسمع كلمة قرض يحس إن هو راجع فبيطمنك ده قرض يعني راجعلك.

- وياريته راجعلك بس ده مضاعفات، وهنا بقى مش ربا ده كرم من رب العالمين {فَيُضَاعِفُهُ لَهُ} وكمان خد على كده {وَلَهُ أَجْرٌ كَرِيمٌ}.